

**Aaqqiissut**

Saqqummiussissut ulloq 13-10-2015-meersup taaserpaa

(Allannguutissatut siunnersuummi aaqqiissuteqarnikuuvoq kiisalu allannguutissatut siunnersuutip immikkoortuata siuliani)

**Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut tunngaviusumik inatsisissamik piareersaasussanik ataatsimiititaliussasut.**

(Inatsisartunut ilaasortaq Per Rosing-Petersen, Partii Naleraq)

aamma

**Tunngaviusumik inatsisissamik piareersaanermi ataatsimiititaliamik pilersitsinissamik UKA2011 Inatsisartut isumaqatigiittut Naalakkersuisunut suliaakkiissutaata aallarnisaqqinneqarnissaanik nalunaarusiamillu suliaqarnerup naammassineqarnissaanik Naalakkersuisut suliaqaqquneqarnissaanik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

aamma

**Kalaallit Nunaata Tunngaviusumik Inatsisissaanik suliaqartussamik isumalioqatigiissitamik kingusinnerpaamik 2016-ip naalernerani Naalakkersuisut pilersitseqqullugit peqquneqarnissaanik Inatsisartut Aalajangiiffigisassaattut siunnersuut.**

(Inatsisartunut ilaasortaq Jens Immanuelson, Siumut)

**Akissuteqaat**

(Naalakkersuisut Siulittaasuat)

**Siullermeerneqarnera**

Siunnersuuteqartut Per Rosing-Petersen, Partii Naleraq, Aqqaluaq B. Egede, Inuit Ataqatigiit aamma Jens Immanuelson, Siumut, Tunngaviusumik inatsimmut ataatsimiititaliamik pilersitsinissaq pillugu Inatsisartut aalajangiiffigisassaattut siunnersuuteqarnerannut Naalakkersuisut qutsavigissavaat.

2011-imi Inatsisartut Upernaakkut ataatsimiinneranni, Aqqaluaq B. Egede, Inuit Ataqatigiit, aamma Siumup Inatsisartuni ilaasortaatitai, tamarmik immikkut taamanikkut Naalakkersuisunut Tunngaviusumik inatsimmut ataatsimiititaliamik pilersitsissasut, Inatsisartut aalajangiiffigisassaattut siunnersuuteqarput. Taamanikkut siullermik nassuiaasiortoqassasoq, Kalaallit Nunaannut

Tunngaviusumik inatsimmut ataatsimiititaliamik pilersitsinissaq pillugu Inatsisartut aalajangiinissaannut tunngavissaliisussamik, taamanikkut Naalakkersuisuusut inassuteqaataat malissallugu Inatsisartut aalajangerput.

Taamanikkut Naalakkersuisuusut 2012-ip naanerani nassuiaat naammassisussaasimagaluarpaat. Kisiannili nassuiaat naammassineqanngilaq. Inatsisartut aalajangiinerisa pisussaaffiliinerat naluneqanngitsut qinersinissamik nalunaarutiginninnerup kingorna atorunnaartarpoq, kisianni tamatuma kingorna Naalakkersuisooqatigiilersut nalaanni suliaqarneq ingerlateqqinneqarpoq, kisiannili naammassineqarani. Aammalu maannakkut naluneqanngitsut 2014-imi qinersereernerup kingorna naalakkersuisooqatigiit nutaat atuutilerput.

Kalaallit Nunaata namminersulivinnissaanut suliap ingerlaneranut ilaatillugu Namminersorlutik Oqartussat Tunngaviusumik inatsimmut ataatsimiititaliamik – imaluunniit naalakkersuinikkut aaqqissuussinissamut ataatsimiititaliamik - pilersitsisinnaassasut qularnanngilaq. Namminersorneq pillugu inatsimmi 2009-imeersumi inatsimmut nassuiaatini allassimavoq: ”*Naalakkersuinikkut aaqqissuussinissamut piareersaataasumik sultanik ingerlatitsinermik Namminersorlutik Oqartussat nammineerlutik aallartitsisinnaapput. Taamaalluni Kalaallit Nunaat namminersornermut inatsisip aaqqissuunneqarnerata iluani namminiilivinnissamut ersarissumik piareersaasinnaassaaq.*”

Soorunami apeqqummi tassani Naalakkersuisut Inatsisartut aalajangiinerat ataqqissavaat. Naalakkersuisut Kalaallit Nunaannut Tunngaviusumik inatsimmut ataatsimiititaliamik pilersitsinissamik imaluunniit nassuiaammik Tunngaviusumik inatsimmut ataatsimiititaliamik pilersitsinissaq pillugu aalajangiinissamut tunngavissaliisinnaasumik siusinnerusukkut suliaqarnerup aallartinneqarsimasup naammassineqarnissaanik Naalakkersuisut peqquneqassasut Inatsisartut aalajangiigaluarpataluunniit. Naalakkersuisut paasissutissiisutigisinnaavaat nassuiaat suli naammassineqanngitsoq, 2016-imi naammassineqarsinnaassammat, tamatumalu kingorna Tunngaviusumik inatsimmut ataatsimiititaliamik pilersitsinissamik aalajangiinissaq tamatuma kingorna pisinnaassalluni.

Naalakkersuisut inassutigaat nassuiaat siullermik naammassillugu allanneqassasoq, tamatuma kingorna paasissutissiiviunerusumik tunngaveqartumik Kalaallit Nunaanni Tunngaviusumik inatsimmut ataatsimiititaliamik Namminersorlutik Oqartussat aalajangiisinnaapput qanoq pilersitsisoqassanersoq.

Taamaattumik naalakkersuisut siunnersuutigissavaat isummerfigineqassasoq allannguutissatut siunnersuut matumani saqqummiunneqassasoq tamatumani tunngaviusumik inatsit pillugu isumalioqatigiissitap pilersinneqarnerani pingaarutilimmik tunngaveqartumik aallaaveqaqqullugit.

**”Naalakkersuisut peqquneqarput Kalaallit Nunaata Tunngaviusumik inatsisissaa pillugu Isumalioqatigiissitamik pilersitsinissaq pillugu nalunaajaammik 2016-mi Inatsisartunut saqqummiussaqaqqullugit taamaaliornikkut Namminersorlutik Oqartussat qulaajakkamik tunngaveqarlutik Kalaallit Nunaata Tunngaviusumik inatsisissaa pillugu Isumalioqatigiissitamik pilersitsisinnaassammata.”**

Taamatut Naalakkersuisut oqaaseqarlutik Inatsisartuni oqallinnissamut qilanaarput.